# जेके बैंक की 80 शाखाओं में बनेंगे आधार कार्ड 

राज्य ब्यूरो, श्रीनगर : जम्मू-कश्मीर बैंक अपनी 80 शाखाओं में आम नागरिकों के आधार कार्ड बनाने की सुविधा उपलब्ध कराने जा रहा है। पांच शाखाओं में यह सुविधा शुरू हो चुकी है। बुधवार को बैंक के एग्जीक्यूटिव प्रेजिडेंट एसएस सहगल ने यह जानकारी दी।

जम्मू-कश्मीर बैंक मुख्यालय में एग्जीक्यूटिव प्रेजिडेंट वागेश चंद्र की मौजूदगी में उनहोंने बताया कि 31 दिसंबर तक सभी खातों को आधार के साथ जोड़ा जाना है। फिलहाल 46 फीसद खाते ही आधार के साथ लिंक हुए हैं। इस समय बैंक ने लगभग सात लाख खातों को पैन व फार्म 16 की औपचारिकता पूरी न होने के कारण

अस्थायी तौर पर फ्रीज कर दिया है। वागेश चंद्रा ने वीरवार को होने वाले मुद्रा मेले की जानकारी देते हुए बताया कि 15 अक्टूबर को जम्मू में भी मुद्रा मेला होगा। पीएमओ में मंत्री डॉ. जितेंद्र सिंह बीरवार को मेले में मुख्यातिथि होंगे। मुद्रा योजना प्रधानमंत्री नरेंद्र मोदी द्वारा देश में छोटे उद्यमियों और स्वरोजगार के इच्छुक युवकों की मदद के लिए शुरू की गई है। इसके तहत 50 हजार से लेकर 10 लाख तक का कर्ज उदार ब्याज दर पर उपलब्ध कराया जाता है। राज्य में तय 2433 करोड़ रुपये का कर्ज मुद्रा के तहत देने का लक्ष्य था, लेकिन तीन सालों के दौरान राज्य में जो हालात रहे, उनके कारण 41 हजार लोगों में 1003 करोड़ ही बांटा जा सका है।

